



Jumat, 23 September 2022
Ogen: Kuan-kuanen 11:16,22



Diberu Si Ihamati



Jadilah wanita yang mahal yang diinginkan semua orang namun hanya satu yang mendapatkannya. Kata si ibelasken kalak pentar enda tuhu-tuhu ncidahkan kegeluhen sekalak diberu si tuhu-tuhu paguh. Mbue tantangan geluh si erbahan manusia ngelabuh seh ndabuh tapi adi e ipediat tuhu-tuhu kegeluhen enda rapuh kal. Adi si perdiateken kawes kemuhenta, paksa kita er-PA, nuri-nuri kecibal geluh, menam kerina lit perbebenta. Tapi seh asa genduari ngasup denga kita ndalani kegeluhen enda sabap nggit kita erlajar, megegeh kita i bas kiniteken, lit inganta erpengarapen e me keleng ate Dibata.

Enda me kepentaren selaku diberu, tuhu geluh enda pilihan, semangat ntah kote, erjuang ntah nerah nentunen ulihna denggo. Ituriken penulis kitab kuan-kuanen kerna kecibal diberu i bas kegeluhen si iperdiatekenna paksa e.

- Diberu melias, ihamati petembil ras kalak si merangap mpepulung kebayaken, la mehangke kalak sideban man bana.
- Diberu mejile tapi adi la beluh ertimbang ipeseri ras emas i bas uncim babi, la lit gunana, la lit ertina.

Biak ras rupa mbelin kal ngaruhna ku bas kegeluhen ras perbahanen bage pe ulihna i tengah-tengah masyarakat. Rupa mejile banci lanai meherga dikune la itambahi biak mehuli tapi adi biak mehuli ras perbahanen si sikap kurang pe merupana banci mereken kegeluhen si mbelin ertina.

Alu bage selaku diberu mbelin kepe perjuangenta, usahanta mpelambarui biak-biakta. I bas kerina paksa kegeluhen si man alankenta, semangat perlu ipebelin. Sabap kita e me tinepa Dibata si istimewa. Si ergai pemere ras perbahanen Dibata e i bas geluhta alu iergai ras ihamati kita.